

四庫全書

集部

欽定四庫全書

集部

石田文集卷五

詳校官庶臺臣龍廷槐

侍讀臣孫球覆勘

總校官編修臣王燕緒

校對官中書臣高中

謄錄監生臣黃臣鵠

欽定四庫全書

石田文集卷五

元馬祖常撰

樂府歌行

元日應制萬年歡

瑞氣祥雲擁龍光
五色絳闕春迴析木天
街秀潤日月重輝聖主垂衣坐治萬國盡衣冠
朝會鵷行底濟濟鏘鏘喜瞻仙仗旌旗和風動洽九垓聽椒花獻頌白獸尊

開采勝辛盤民物一時康泰樂府新裁曲譜鳳笙起彤
庭雲靉青霄外隱隱嵩呼延祐與天同大

南方賈客詞

江岸琅玕悲帝婦雲光漏日波含霧瀧船春下鷓鴣林
青幘蠻郎占龍戶千尋高杉生翠微壯人去買極葛衣
鷄骨卜神銅鑄鼓却憶冰紈將壯歸

踏水車行

松槽長長櫟木軸龍骨翻翻聲陸續老父踏車足生繭

日中無飯倚車哭乾田犂确穉禾槁高天有雨不肯下
富家操金射民田但喜市頭添米價人生莫作耕田夫
好去公門為小胥日日得錢歌飲酒朝朝買絹與豪奴
識字農夫年四十欲踏車脚脚失力宛轉長謡隴卧一作
畝間誰能聽此無悽惻

縑絲行

縑車軋伊繭抽絲桑薪煮水急莫遲黃絲白絲光縱縱
老蠶成蛹啖兒飢田家婦姑喜滿眉賣絲得錢買暮羅

翁叟慣事罵婦姑只今長男成葭蘆秋寒無衣霜冽膚
鳴機織素將何須翁叟喃喃罵未竟當門叫呼迎縣令
騶奴橫索馬鞭絲婦姑房中拆纈經

拾麥女歌

隴雉飛桑扈鳴老蠶入簇繭欲成原頭腰鎌者誰子刈
麥歸家作餅餌心知棲畝有滯穗惻惻忍收寡婦利寡
婦持筐衣藍縷終朝拾麥滿筐筥兒啼婦悲竈無火寒
漿麥飯晡時取豈不見貴家妾豈不知娼家婦繡絲繫

襦蓮曳步銀刀繪魚佐酒杯狎坐酣歌愁日暮拾麥女
拾麥女爾莫嗟爾莫憂人生賦命各有由前年貴家妾
籍入為官婢今日娼家婦年老為人棄貧賤艱難且莫
辭畢竟榮華成底事

古樂府

天上雲片誰剪裁空中雨絲誰織來蒺藜秋沙田鼠肥
貧家女婦寒無衣女婦無衣何足道征夫戍邊更枯槁
朔雪埋山鍊甲澁頭髮離離短如草

河西歌效長吉體

賀蘭山下河西地女郎十八梳高髻茜根染衣光如霞
却召瞿曇作夫婿紫駝載錦涼州西換得黃金鑄馬蹄
沙羊永脂蜜脾白箇中飲酒聲淅淅

垂綸亭歌為宋誠夫作

江水東駛漢水清雙流合出蜀門陁春蛟鼓濤崩石棧
風寒土窟陰翳腥八月秋雨作沮洳長年操舟憂性命
蒯丘文宣君家有早晚梢雲得栖鳳何為垂綸楚傖傍

豈其食魚必河魴截波密網小魚爛寡婦之笱散其梁
嗚呼我歌君試聽彈鋏歸來讀古文日高鑽火飢煮字
一釣六鰲何足云

老將行送宗道總管

南山日暮田間歸酒酣眼纈見大旗囊中兵書白魚蠹
禿袖戰袍寄蘭錡老來數奇不封侯騎馬聞逐里中兒
聞說西南有滇棘千里宿莽翳畬菑將須喜上充國策
詔許將軍知尺籍明發北辭龍尾道馳入朱天紅帕額

盡呼成卒脫兜鍪却使征夫携襁褓自古壯士多行役
嗟哉兵農爾畊射

淮南田歌

十首

東塘水初滿西塘泉又生春風兩塘側多少路人行
老翁白髮短放牛田間卧記得南朝事怕臨淮水過
西莊竹筍長生過東家塙東家吃竹筍日日笑西莊
魚兒隨水上到我屋前溪更怨溪水小隨雨過南堤
蒲生亦有筍菰生亦有米可憐芙蓉花照影秋塘裏

鷺鷥白如雪
鸕鷀背復長
雙立田塍間
知是魚滿腸
牛飽早耕田
田中水潏潏
春晚蘋草生
牛刀更可憐
借錢買鹽茶
倩人蒔早秧
日望秋田熟
仍防野鴨傷
江東木綿樹
移向淮南去
秋生紫萼花
結綿煖如絮
鉏田莫用懶
夏日背上炎
秋稅入官倉
雀鼠背尖尖

淮南魚歌

十首

棹船淮水上
晒網赤岸南
船中捕來魚
賣錢買魚藍
小艇如鳬鷖
湘東柴杉木
載家復捕魚
夜夜繫江竹

市中買蠶絲新結橫江網江中魚已盡又結網十丈
白雲渡深竹野水過斜橋鳴榔下淮浦簦箬帶朝朝
船過薰葭浦人家喚買魚回船泊柳岸却問種樹書
長年為魚郎稅魚與鹽官誰云無鄉縣兵籍在邯鄲
渡江問魚價人來索酒錢婦姑亦不惡便煮縮項鰻
桃花水初漲磯頭好下罾取得金鯉魚去換縛船藤
賣魚向城市陌上遇王孫爭買雙銀鯽持去贈紅裙
烏鬼項細細吞魚不下咽海鷗背亦短銜魚入野烟

兩頭纖纖五首

兩頭纖纖杪櫂子半白半黑遼東豕
兩頭纖纖剥剥琢玉几
磊磊落落舞劍士

兩頭纖纖小兒綳半白半黑目中睛
兩頭纖纖剥剥海岳兒
磊磊落落將軍營

兩頭纖纖千畝梔半白半黑大纛旗
兩頭纖纖剥剥解角麋
磊磊落落磨崖碑

兩頭纖纖北斗杓半白半黑千金貂
兩頭纖纖剥剥山中樵

磊磊落落雲間鷗

兩頭纖纖蝟上毛
半白半黑筆中毫
臍臍剝剝擊雲璈
磊磊落落斬馬刀

四色詠

赤如扶桑日青如華岳松
黑如古琴漆白如天女膏

和王左司柳枝詞

十首

郎君巧詠楊柳枝
柳眉初出學月支
隋堤千樹烟光莫
不如柳眉初出時

春日烟雨秋日霜
麴塵絲織衫袖長
誰言折柳獨送客
章臺還堪繫馬韁

鳳城三月草色青
池塘飛絮桐飄零
風吹宛轉低撲人

長空

一作天

白日流榆

一作疎

星

都門輦路花萬株
塞垣苦寒多白榆
獨憐柳枝弱嫋嫋
春情好寫閨中書

馬蹄車輪送客去
兩京遊客還未稀
誰因一斗蒲萄酒
便得梁州刺史歸

索駝馴象奴子騎女郎能舞大小垂蹠林獵罷各獻捷
卷唇蘆葉逐手吹

楊枝桃葉江水逢喜云女蘿附高松白髮滿頭不相見
却嫌吳音呼我儂

渭城別哥淒復淒江都高樓醉眼迷人生悲樂自古有
莫笑棄妻當鏡啼

北客到吳亦懊儂
苧衫蘭漿膏飾容
日食海錯一百品
不敢上京來住冬

鎗竿嶺頭紅白花客行日日不思家尚食聯疊給桂蠹
仙佩屈曲紉蘭芽

和王左司竹枝詞

十首

翠華宴鎬承恩多羽林似飛盡沙陀從臣乞賜官法酒
千石銀甕來灤河

綠繡簷額翠流蘇屬橐舍人金僕姑宮中雲門教坊奏
歌徧竹枝并鷓鴣

玉繩雙闕回蒼龍御溝石甕金水春螭坳詞臣紫橐在

千年河清今日逢

竹枝宛轉貫珠勻
襪羅凌波那有塵
書生好酒恨不醉
丞相莫惜車馬茵

日邊寶書開紫泥
內臣珠帽輦步齊
君王視朝天未旦
銅龍漏轉鷄人啼

金爐寶薰留篆雲
花間百舌鳴早春
五方戲馬賽爭道
傳聲催賜十流銀

紅藍染裙似榴花
盤蔬釘飣芍藥芽
大官湯羊厭肥膩

玉甌初進江南茶

天孫支機織流黃雜花浮簷宮晝長忽見琅玕種石上
却憶羊車來尚方

太微前陳中天居萬年樹影高扶疎漢家諸臣經術士
殿中勸講三王書

流杯池邊是鎬宮金輿翠幃逗微風
鵲川玉液清如水
湛露承恩樂大同

鰲峯歌

太和網緼元氣磅礴兩間駢羅品物錯上為列星精又
為孤月魄天帝司大化月魄浮晴雲星精隕為山之骨
龜宮獸蹲百狀出剜鏤費力鬼工哭不角一作覺五岳形

而注百川竇禹鼎魑魅禦周鼓時王狩西北龍沙域日
浴灤波紅侍臣簪綬光射目周廬靜夜懸橐弓乃有珥
筆稱史氏絲綸出言待茲記神鰲施顛負首載三山至
一寘軒轅臺一沉崑崙河一寘朔南金巒坡金巒坡風
日清美芝箭多前嵒刻丹經後嵒琢商那當戶圯圯古

色碧紫苔蝸涎字痕濕春秋法書心匪石心匪石太史
職

北歌行

君不見李陵臺白龍堆自古戰士不敢來黃雲千里鴈
影暗北風裂旗馬首回漢家衛霍今何用見說軍還如
裏痛不思百口仰食恩豈念一身推轂送如今天子皇
威遠大磧金山烽燧鮮却將此地建陪京灤山回環抱
山轉萬井喧闐車戛輪翠華歲歲脩時巡親王覲圭荆

玉盡侍臣朝紱纘珠新高昌勾麗子入學交趾蠻官貢
麟角斗米三錢金如土國人謳歌將軍樂將軍樂四海
清吾皇省方豈田獵觀風察俗知太平

擬白頭吟

君家四壁立妾家萬黃金憶初未相知良媒賴鳴琴遂
以身許君偕老畢所願如何忍相忘恩情忽中斷昨朝
雙鴛鴦今夕守空床茂陵展嬾婉還彈鳳求凰涼月凝
玉露秋聲在庭樹歌我白頭吟相子長門賦紅淚濕芙

蓉綠苔鬱葱龍羞看舊粧鏡不敢歸臨邛

西施怨

三首

吳王水殿看芙蓉十二簾櫳卷畫重新重

一作得

西施顏

似玉不教宮漏滴銅龍

妾家本在苧羅山一入吳宮便不還自是夫差心未醒

枉將亡國怨朱顏

為妾輕身作館娃妾心刺血報夫差范生事主還無策

教妾傾身亦可嗟

車簇簇行

李陵臺西車簇簇行人夜向灤河宿灤河美酒斗十千
下馬飲者不計錢青旗遙遙出華表滿堂醉客俱年少
侑杯小女歌竹枝衣上翠金光陸離細肋沙羊成體薦
共訝高門食三縣白髮從官珥筆行毳袍衝雨桓州城

次韻端午行

羅襦垂垂扇奩歇守宮持紅不數蜎桐官馬酒銀流漸
內饗餅啖酥凝雪灤水之陽漢陪京拂天翠華風日清

繡絲鞋牆擅南陌玉環鏡鼻專東城射柳王孫五花馬
醉來見客不肯下顙藍攬綠鬪草嬉靈運無須更誰詫
香爐薰衣今幾人蘭階晝永簾光勻圍坐屏風罨畫劇
杯中菖蒲笑回春

翰林故事莫盛於唐宋聊述舊擬宮詞首十

禁鍾初動趣傳宣衣袖薰香到御前漸近宮門扶下馬
內官分引導金蓮

御筆圓封草相麻龍箋香透擁金花儀鸞勅設庭前候

賜酒方終更賜茶

制草塗鴉未敢刪內璫宣引侍龍顏已分筆格金蟾滴
更賜端溪紫硯山

春帖分裁閣分多宮娥爭餽繡羅春絲菜餅銀盤送
幡勝新題墨旋磨

文思如泉涌墨林屏風院史不須尋舊時內相諸孫在
猶有當年掃閣金

入院聽宣席未溫賜金已向按頭存清晨上馬還家去

內出黃麻付閣門

故事入院傳旨畢賜黃金十兩始草制

清馥香溫酒玉脂祝文已撰報都知夜來奉旨傳丞相
五朶雲濃押省咨

天孫夜度玉潢清內托銀盤湧化生秋思未多團扇在
擬題宮怨月分明

盤鵬暈錦是冬衣鵲炭初生酒力微聞到邊臣風雪苦
口宣鵬藥布皇威

贊書謄副節樓前筐篚盈庭邸吏傳深恨胡蘆陶學士

受渠犀玉索金錢

前宛轉曲

紫檀出海南削成琵琶槽上有鴛鴦弦彈曲聲嘈嘈客
問此何聲新聲名絳桃一奏桃始華再奏花枝斜笑靨
頰暈粉仙源飯蒸霞度作新聲曲春樹雙鶯逐雙鶯擲
金梭魚藻蕩圓波陌上行車帶結羅絳苑年少光陰多

商學士畫山水歌

商侯畫山并畫水當今天下無雙比昔者累蒙天子知

晝日三接賜筐篚墨滓翻流雪壁滑閩嶠蜀門生寸晷
五年送絹或不得岸幘飲酒辱畫史江波沉沉樹含霧
疊嶂千層問歸路玄雲夜合風雨交漁師不畏蛟龍怒
倚雲茨屋如宮龜繆枝應有猿狖悲暝靄依稀蜃樓出
暗霏彷彿鰲峯移君不見剡藤一丈光陸離嗚嗚野父
秋行迷

磨劍詞

黃金陶冶子為報鑄劍恩將軍未使時佩劍立軍門初

斬樓蘭王衣無點血痕再斬無義子馬走不及奔白髮
滿兩耳將軍不能軍病臂尚磨劒天子已脩文

蕭性淵善鼓琴子嘗為之作我思操今自和林
歸再任巡徼之職于江南比行又求子詩遂為
賦漢銅馬式歌以送之

漢家金銅鑄馬式求馬相此不失一塞上將軍得一足
蹢躅如龍高八尺日斜騎出陰山道獵獵霜風鳴淺草
鞍後並懸雙白狼歸來穹廬月弓好江南綠蕪春接天

只須一抹蹴雲烟
摩訶舊是將軍種
酒澆青衫學控弦
反銅馬式歌送熊太古

古來相馬不相皮
驥服鹽車雙耳垂
轅下局促上九坂
躡雲駿足何由馳
奈何漢家鑄馬式
求馬求中工人規
厚蹄長鬣尻肉滿
毛理光澤為權奇
縣官芻豆給飼品
氣憤牽出當路嘶
伯樂死後驥空出
千金何人買駿骨
楊花宛轉曲

空中游絲已無賴
宛轉楊花猶百態
隨風撲帳拂香奩

渡水點衣榮錦帶輕薄顛狂風上下燕子鶯兒各新嫁
釵頭燼墜玉蟲初盆裏絲縈銀繭乍欲落不落春沼平
無根無蒂作浮萍縵波綉苔總成媚人間最好是清明
清明艷陽三月天帝里烟花匝酒船石橋橫直人家好
小海白魚跳碧藻榆莢荷錢怨別離不似楊花宛轉飛
楊花飛盡綠陰合更看明年春雨時

擬刻亭棹歌六首

棹船雲錦溪頭過自唱江東新櫂歌照眼水明霞霽雨

侵衣好風日酣荷

擬剡亭前山水好如雲如錦靜嬋娟主人天上吹笙去
屋角青蘿掛紫烟

斗北天南春滿地香爐丹竈過年年君王不許還山去
莫言騎馬似乘船

季真瀟洒風塵外乞得山陰一曲湖頭帶黃冠披鶴氅
秋田歸去別薜蘿

仙子秋風紫綺裘舊家雲錦溪水頭我今愛酒似李白

便擬饒州似越州

稽山酒船且莫回
賀老辭朝早晚來
瑤草瓊花滿人世
君王方許下蓬萊

公子行

緣香繡帳乘流蘇
床頭三尺紅珊瑚
十八窈窕秦羅敷
曲房小步璫鳴襦
高堂公子吹笙竽
百斛明珠買艷艸
蘭燈桂漿炙文魚
但苦不駐羲和車

擬唐宮詞

十首

華清水殿綉芙蓉金鴨香消寶帳重竹葉羊車來別院
何人空聽景陽鐘

銀床井冷露漙漙半臂薰衣釧辟寒不恨長門冬夜永
水奴休報襪羅單

長門月轉漏聲催自熨寒衣減帶圍休怕官家嫌體弱
細腰曾是楚王妃

合宮舟泛躍龍池端午爭懸百綵絲新賜承恩脂粉硯
上陽不敢妬蛾眉

繭館縑絲濕翠翹夫人纖指織龍綃羅襦雙佩清晨響
只恐君王有宴朝

八姨粉翠錫千緡脂盃新粧百寶勻白髮上陽宮女老
補衣重拆繡麒麟

夕酒微微醉宿醒催花羯鼓變新聲君王好賜承恩宴
辛苦邊頭百將營

露蘭研粉壽陽粧奩內新燒百刻香圓舌教成鸚鵡語
偷將玉笛送寧王

銀河七夕度雙星
桐樹逢秋葉未零
萬歲君王當宇立
妾身不怨命如萍

花氣蒸霞淑景明
望仙樓上看彈鶯
李暮吹笛宮牆外
學得梨園第幾聲

贈陳衆仲纈雲辭

纈雲織波射金水
郎君水西著皮履
南陌紫塵十丈高
捋鬚買酒意氣豪
萬里將書憑水鳥
荔枝千顆團團小
天津不隔少微星
閭闔門開夜光曉

雜言

秋江釣月

秋天月落秋江底
狂客持竿釣不起
我知月魄在天上
天地山河終不昧
收君釣絲解君餌
還我光明照千里
君不見古來亦有謫
仙子被髮長歌弄江水

霞川

越國山明罨畫剡
溪陂瀉雲藍袍發
故鄉晴炫船迷歸
路春酣

墨香東家絲桐間高堂我方與客歌簫簫狎蛟龍兮騎
鳳凰渭川淇園在何方

送艾伯蒼歸江西

豫章艾生衣逢掖京國行歌髮半白石渠諸儒論秦灰
官高不肯虛左席暮春南行上鄒嶧更觀古刻封禪石
慘淡野陰生布袖壯士長年饑餓厄

巢溪

巢溪之水清且美亦有蛟與龍亦有魴與鯉無使魴鯉

亂無使蛟龍

缺

喜知經筵蔡國張公至

行夷猶憺容與載兩旗駕四牡喻曾

一作逾高

山遵大路日

在天雲作雨將至止德容度晨脩觀適帝所

書石辭

清潭木落霜曉騎馬獨吟北山誚竊祿而無恥徒三往而三還

兔窺蝶圖

兔斯首神注目天為辰神不畜封中書賦梁王奔蟾宮
走兔場生無雄居有穴爾形肖我書揭

六言

五首

借馬出城移竹取錢與客收書洞口蜂房割蜜

缺

南塘雨晴草滿西林春早花疎道士燒丹借竈山翁種
樹求書

白鳥飛來何許青山閒對誰家日暮一尊濁酒不知風

帽敲斜

絕澗花迎暮竹田塘水媚春雲欲賦淮南招隱山中桂
樹留人

竹下茶甌晚步花間酒榼春行誰訪青山白髮道人留
我題名

楊孝廉義烏

密雲縣裏日欲西楊家樹上烏來棲啞啞鳴聲似兒啼
日出捉蟲哺母飢君不見延秋門姑蘇臺詩人歌曲至

今哀烏兮烏兮去復來孝子有念烏無猜

商學士萬里圖

曹南商君儒家子身登集賢非畫史酒酣氣豪不敢使
揮洒山水在一紙咫尺萬里乾坤意人言造物真兒戲
盤紆流動各有象變化歛忽風雲至吾觀崑崙四月出
更觀扶桑東日生形勢開合限內外分野上合星辰精
大禹鑄九鼎鄒衍外九州豈但草木異乃有鬼魅憂噫
嘻奉常官祿薄百錢縫囊貯丘壑為爾作歌還一噓何

年淮南戴青箬

聯句

秋雪聯句同袁伯長賦

白帝欲返馭玄神已先驅南山黯遐睎西顙阻清斂刻
雲環珮雜剪水瓊瑰敷金英受剛潔丹桂遭模塗高標
變鬚髮爽氣通微軀羣陰孤陽僨積素五采腴路修天
鷺疑穴覆野兔呼蟬翅抱殘槐鴈影驚拆蘆混瀟露莖
溜空清冰柱酥或云勢已盛又言理非殊先時明堂嚴

薄刑辱收誅浮華敵春澌斂實侔冬輸對立各動色沉
思儼徐趨鴻鈞轉橐籥緹室潛葭莩觀物昧休徵永歌
啓貞符

鸚鵡聯句同王繼學賦

雕籠居啄桃袷服儀采綠南荒孕靈質西顥發麗曲頸
綬紅縈絲啄棘頰屈玉蓄慧婉含章裸彩翠成縵能言
貫珠舌善舞凌雲躅金眸肖韞隼珍畜異巢鵠層塔寶
舍利深杯注醺醺流丹曙林度隨翠春洲浴石鏡影瑤

總銅梁步陸績題賦吾豈能入貢爾應錄

都城南有道者居名松鶴堂暇日同東平王繼
學為避暑之遊因作松鶴聯句

偃雲聳層霄驚露落古雪虬枝憇乘澗鷺羽陋鳴埵蟠
石千歲苓頂朱百齡血胎禽哺春巢乳脂凝洎節舞蓋
竽籟喧啄粒苔蘚嚙玄玉薰麝煤碧脰溢鷄堞陟岳秦
爵崇授甲衛軒劣沐髮豹霧深引吭鳳竹裂風馭八極
小河舟三翼拙魯縞曳襦褌夏社挺截薛任重明堂材

言歸華表別拳縮包胥立堅剛伯夷烈延世餌芳液顧
步炫高潔作室擅茲美觀物入獨閱誓將束囊書從爾
解珮玦

天慶寺納涼聯句

槐屋夏陰繁石池暑氣清高堂瞰

一作

福田遽字依王

城午磬梵唄集夜廊酥燈明龕經鬱金字壁礎承丹楹
寂寂鵲樓栗宛宛燕穿榮露葵炫晝艷霞藥敷陽英境
閒便靜室心古樂高情逍遙祇園賞迤邐廬社盟山枕

藉雲潤水簾凝冰輕飯盃給香積架衲褱華纓海圖岩
壑折天樂音聲鏗荔牆護筠粉桐甃沉榴瓔共忻朋簪
合敢謂詞鋒并睥睨荒草棘橫縱按林垞幽尋振塵鞅
雅淡心一作忘飛觥鄙哉河朔飲投幘得世名

聯句

鏡檻芙蓉入香臺翡翠過撥絃驚大鳳交扇拂天鵲隱
忍陽城笑喧傳郢市過仙眉瓊作葉佛髻鈿為螺五里
為陰霧秋天只見河此句疑誤月中脩藥剩海上得綃多玉

集胡沙割犀留聖水磨斜廊穿戲蝶小閣鎖飛蛾騎檐

侵韞卷車帷約懣鉞

五戈切

傳書兩行鴈取酒一封

一作峯

駝橋迴涼風壓樓橫夕照和待烏燕太子駐馬魏東河
想象鋪芳褥依稀解醉羅散時簾隔霧卧後幙生波梯
穩從攀桂弓調任射莎豈能拋斷夢聽鼓事朝珂

至治癸亥八月望同袁伯長虞伯生過槍竿嶺
馬上聯句

有嶺名槍竿其上若棧閣白雲亂石齒青峰轉帘脚積

冰太古陰出礦無底壑馬飲沆瀣泉鷹盪扶搖幙轍蹟
委垂紳人聲發虛橐鳥飛接鳥背羽沒疑虎膊霧松秋
髮長霜果紅頰薄斤樵不知疲獨往端有愕兢兢矛頭
淅杌杌井口索凝睇見日觀引手探月窟南下渺塵海
北廣絡沙漠金橋羣仙遊寶塔百神鑿禽鳴蜀帝魂鐵
鑄石郎錯闌干挂鈎衡欖槍斂鋒鏑屬車建前矛馳道
拘嚴拆載筆三人行弭節半途却

騷

國陽

出國陽以行野馬驤首兮在路望春樹兮不歸欲臨流
而先渡

發淮浦

發淮浦兮遡黃流鼓船舷兮極浮遊雲漠漠兮天已秋
攬芙蓉兮艤芳洲酌吾酒兮樂無憂懷佳人兮結綢繆

天碧辭贈姚道士

仰日月之所麗知下土之為卑充積氣於兩間其映一作

塊然而在茲日蒼蒼以圓形因嗟世之多迷若夫人之
有道將大觀而弗私

閩中山水

有樛兮灌木有穹兮崇屋石礦兮泐漁師樂兮榜連

下疑

有屬字

九成宮圖

泉濺濺而響谷風瑟瑟以動林夾兩山以為趾絡下塹
與上岑宮纖麗以媚女觀騫翥以凌塵矢池魚而泳泳

飼有麟而馴馴帝奈何兮不樂將弭乎江津

華清宮圖

帝出車以鳴鸞儼六龍之驤首循長陸而東驚謂泉源
之在右穹閭闔之天門封百二而為垣朋猗謁而不醜
嗟神堯之文孫

我思操贈琴生蕭性淵

八風兮颯颯遍宣兮音通律節兮應同臣商兮君宮龜
之山兮松有枝美之里兮田有萊天不喪兮何悲顧欲

顧兮令我思

賦

傷已賦

嗟余生之多憂兮幾顛踣而數窮誓續言以自見兮力
追古之高風呼蓂龍以駕我兮俾蓂使使為期何九稼
之不一獲兮尚偃蹇而如茲豈剗剗之有不善兮將世
德之下賢薦芻蕘于宗器兮綴履綦以璣璫封敦旒以
塊泰岱兮謂汎濫其莫涯冠髻童以弁冕兮問禮意而

莫知決大疑於淫鬼兮憑巫傳以度撥顧聖言之轍鞅
兮指綱維為械意憫相通之無朋兮去一髮之幾希扼
吾車之莫聘兮膠吾口而難辭懲前悔之不憚兮配古
道其或可思一旦捨此而改圖兮念後余之病我日浚
惡以啓湮兮患世之屏經而好權遭岐蹊之多迷兮世
或謂其固然抱昌辭以適與我兮俟來學以偕行辨百
家之糾紛兮孰察余之衷情亂曰我涉大波孰為航兮
我載大塗孰為箱兮古聲嗶嗶金石之揚兮世無悵兮

適忘賦

適機子遇忘機子於大都適機子曰若知吾適機乎凡
羣動萬彙叢生沓來肯綮轆轤泉滲穴開揣摩捭闔迎
合附會孕奸媒孽逆承人意子不吾信請衍斯義惟是
都也子欲浮閩越吳蜀則登舟子欲奔并冀朔漠則升
車若東若西或南或北扶耄挈稚囊金橐穀發軔則達
不俟龜卜顧茲弗覺而踽踽齷齷木偶弗若譬驥之童
鬣牛之食角子何不智甚耶忘機子曰子庸知我之蘊

底耶今子說我以私智啗我以功利陰墜厥醜陽塗其麗固妾妻之所羞而輿臺之是貴我游神八紘而身寓一室心翫千古而親不離席幽晦莫耀韜閔莫測明是非於後世公得失于方策邈邈綿綿似消似息鑑空淵渟罔有形迹子令我登航浮流則航有覆令我升車涉途則車有軼何發軔之遽達而謬以不知目我哉適機子啞而愕噓而笑曰八紘寥廓子將奚托千古冥冥子庸用學眩煌煌之輿馬烜赫赫之官爵彼幽晦與韜閔

實狴犴與鈴鐺後世孰親於妻奴方冊孰快於女樂同
生同死臯夔羿浞世方溟渤奚翅澆潏喑粟斯無害
於儀鷗夷脂韋無損於皮若夫航之覆車之軼寧盡廢
車航也哉不智之機子復何辭忘機子拊脾鼓膺咤且
吁曰初聞若之辨可駭可慕旋而籌之惟螽惟蠹慨戰
國之口頰俾宗廟其墟墓墨焉朱焉悲絲泣路繫二賢
雖詭迹於孔孟庶憚天於朝穆順于骭骸改我軌步或
噓或煦或濡或响雜肖翹於一喘羣黃卉於一澍槁植

索塗螟肩羸負吾恐禍天下之英才子且吞言而勿吐
適機子曰有是哉姑置之子自礱爾璞我固淬我稍孰
利孰鈍厥效卓卓忘機子曰大璞不礱大金不淬蔑爾
利鈍奚傷至器二子方藻吻簧舌矛盾辨詰有馬子者
魯仲連之流也以書連矢射其所曰夫天地精明人實
肖形倥侗顓蒙教學陶鈞蓋金玉之合應匪忘適之異
情子盍聽鈞天於廣野覲萬舞於天庭然後範聖度揆
時中蹈龍蛇占鳳麟茲豈非莊周氏所謂天民者乎二

子解圍合盟而去

悠然閣賦為周南翁作

舒吾眺之落落兮觀寥廓之無跡會冥冥之遐思兮契
萬品之攸職擬大化而罔象兮悼世德之圉形聿逍遙
而容與兮泊乎游乎太清是有當於吾衷兮表吾廬以
自肆騁余馬於析津兮崇吾屋乎江汜揭高躅于古道
兮追前脩其或然偉一世君子兮又贈之以蘭荃曰予
未有知兮何私意之彷彿懿夫子之悠然兮殆及予乎

空谷

草亭賦

長清先生被召供奉翰林之明年構亭於所居之前扁
名曰草亭謂其友夷門之客曰古者能賦可謂大夫客
盍賦斯亭以見志哉且無盈辭以夸無曲辭以競無剗
辭以飾而亦無寓辭以病也遂為賦曰都邑雄雄有亭
厥中廣可函丈而高如廣縱赤垣外塗而白茅上崇者
非先生之草亭耶予蓋得觴酒賦詩于其下矣弱篠小

草菴菁乎其左茁也丹藹碧粲窈窕乎其右擷也壺箭
博局琴几畫圖度而設也筆簡研石書帙劒器布且別
也秩然其有截也憺乎其能潔也冠屨肅肅佩玉在躬
籩豆晏晏言笑有容朋合悅也登降步趨衣帶委如姬
孔輿輿諷言徐徐自整攝也是則游息之植學燕閒之
修業者固可徵於前哲也夫至乃葺屋作室黜堊丹漆
華目鑠心文綵差參回廊曲房翺翔步璫飛閣虛堂擊
鼓吹笙此固侯王之所當而非下士之所可常俄有一人

歌於坐旁其歌曰衡門之下可以棲遲有美君子不恤其私曄也古辭作亭叢叢蝸蟬龜穹于室之東繫古之宗今又歌曰爰有人兮好儒視藐藐兮獨趨不齷齪兮以濡疇道之依兮而孰與居

感栢樹賦

光州孔子廟庭及宋司馬光祠前栢樹皆先子集賢府君治光日携祖常手植者也今二十六年矣蒼虬翠蛟森列左右祖常蒙詩書之澤忝官禮部尚書兼經筵官

天歷己巳正月以謀葬得請還光又蒙聖天子不棄敝
物馳使再召以疾未行與疾瞻仰孔子廟庭撫摩羣栢
潸然感思作賦以見意焉

涉淮湍而返有寢丘之遺封屆州圻而近古壤寡殖而
不豐曰瘠土之民勞庶善心之易孳慨先哲之豈弟興
鬻宇而納之哀剝兵之纍俘緣其裳而來游又於田以
謀食廩饋錙其浮浮間攜我以觀學命畚鍤以執事揖
豆籩以下堂列穉植於兩廂蔭喬木於今茲慕予親於

曩昔歲邈邈以云徂涕潛然而洒臆顧瞻戀而移晷拭
手澤之或存歸祠位之蔽虧恍神輶之續緡當予親之
在官盡厥諝於民庸暑無葛以代澣珮無玉以為容終
下陳而弗忤榮天爵以俟天禪未艾於子孫永文壽於
大年矧茲樹之後彫匪庶草之競華覩斯道之昌期徵
於神而不遐

石田文集卷五

欽定四庫全書

石田文集卷六

元 馬祖常 撰

制誥

遣奉使巡行詔

朕祇承洪業夙夜惟寅凡所以圖治者悉遵祖宗成憲
曩者屢詔中外有司宣布德澤蠲賦省刑賑恤貧乏思
與黎元共享有生之樂尚慮有司未體朕意庶政或闕

惠澤未洽承宣者失於撫治司憲者怠於糾察俾吾民
重困朕甚憫焉今遣奉使宣撫分行諸道案問官吏不
法詢民疾苦審理冤滯凡可以興利除害速宜舉行有
罪者四品以上停職申請五品以下者就便處決其有
政績尤異暨晦跡於丘園才堪輔治者具姓名聞咨爾
臣庶體於至懷

追封河南王夫人制

古者婦人之義名字不出閨門迺所以別男女嚴內外

也故河南行中書省左丞相布拉吉達妻胡氏徽柔惠
淑蚤嬪高門相其夫子顯聞于時予方推恩四海矧我
股肱之舊而有爾伉儷之良乎故追封爾為王夫人仍
啟河南故圻以從封夫爵噫婦官一品綸翟有光其尚
陰隲爾家服我寵休之無替

思州軍民宣撫使田冕晃和爾布哈封贈二代
制

國家外建藩屏以靖遠人責其宣布懷仁之惠能使恩

威並流而一方清謐者稽于國典可不賞勞乎具官某
父某官某向膺朝寵勤庸服官勦力小心不聞有過乃
教忠於嗣子得寵慶於世家茲朕所不忘者也故命追
褒異數階秩一品有靈在幽尚迪爾後

比屬有司考禮於卹典矣而婦人之貴嘗視其夫子焉
况有鵲巢汝墳之懿能行於其閨門衽席之間者乎具
官某母某氏女儀柔婉來嬪辨族相其宗事珩璫有節
又能篤生令子服柔疆場撫綏之勞湯沐行封胙以列

國其尚歆承休寵利爾後昆以延饋祀之無已哉

朕以孝治天下凡人臣之親悉命因其班列之次功庸之等以為寵數之異焉具官祖父某官某昔備官使輯綏邊氓頗著惠懷有譽南服夫天之施仁於物無間朕敢不法天而已哉宥密之司階品為貴啟爾後人保茲終吉

先王制禮婦人之義飲食衣服祭祀而已非有與於外事也然或婦道母德可以表率宗族而成其夫子者願

宜有以顯賁之也具官祖母某氏早躬組紉克遵女戒
作配令族柔閒有儀惟時聞孫扞我邊圉膺被爵祿光
寵於時而爾可不疏封鄉國以廣彤管之訓乎贊書在
門其告泉壤

太師右丞相封贈三代制

定策元臣肇啟中興之運推恩彝典聿申先正之褒揆
禮是宜勸善惟允具官某質實無競沈鷺有謀服勞王
家久著屬橐之績薄違圻父夙專乘一作東障之功嘉爾

曾孫為予冢宰於戲漂陽開國儀崇斧鉞之光冊府書
勲銘載旂常之顯英靈如在寵數是歆

曾孫有慶衍三世之恩榮大賚匪私勸百辟之忠蓋有
嘉淑女作配先臣具官某妻某孝養姑嫜教遵姆傅居
謹珩璜之節躬親絲枲之勤宜厥家人相其宗事魚軒
翟茀往膺江左之封鳳詔龍章用播召南之德歆予時
命迪爾後昆

開國承家禮重昨歆之典析圭儋爵恩先予善之仁報

施匪私褒崇惟稱具官某英標倣儻偉器沉深蚤奮厲
於師中爰馳驅於戎右股肱心膂桓桓挺萬夫之雄弓
矢干戈井井飭九伐之法世稱良將胄衍名孫定大策
於樞機奠皇圖於寰宇於戲石城鍾阜肇開赤壤之封
礪山帶河允著丹書之誓賁爾窀穸歆我絲綸

朕茂膺景運大賚元勳恩推再世之封禮及重闡之慶
具官某妻某氏柔嘉維則婉孌有容事夫盡舉案之恭
職脩中饋弄孫致含飴之樂福裕後昆凡我邦國之光

繫爾室家之助鳳臺昨土聿開脂澤之田鸞詒封泥永
賁泉扃之兆尚歆寵數益衍休祥

朕以崇德報功實先王之令典建邦啟土昭奕世之殊
勛睠我舊臣錫茲新命具官某魁竒天挺卓犖人雄韜
略邃於孫吳志勇邁乎賁育昔武皇撫軍於龍漠躬櫛
風沐雨之勞而大將出陣於魚麗懋掃穴犁庭之績威
行萬里恩浹六師訖振旅以裹戈底來賓而包匭每御
衣裳之會聿深鐘鼓之思生子象賢由教忠而尚義為

國敵愾遂翊運以中興永惟閱閱之隆端繫社稷之重
不有異數曷稱至懷於戲茲矢彤弓嘗旌勤於征伐丹
書鐵契尚迪慶於承傳淮甸分茅泉臺告第

朕眷元臣之勛幼被慈母之訓屬有司之考禮宜大國
之疏封具官某妻某毓秀名門作配君子珩璜琚瑀修
婉婉於婦容蒞藻蘋蘩致齋莊於宗事篤生令器實贊
丕謨底海宇之謐寧承邦家之休慶綠綈方底鸞翔芝
檢之書霞帔襲衣雉纁茀車之采江都錫壤泉室增華

太保左丞相封贈三代制

匡時靖難資大策於元臣崇德報功覃湛恩於累葉奉
常議禮與壤定封具官某故曾祖父服勤侍衛秉信功
臣太傅銀青榮祿大夫上柱國梁國公謚敬簡塔瑪噶
爾秉質無華詒謀有永蚤備勾陳之列式昭析木之祥
衍善慶於曾孫篤忠貞於熙代使宅百揆光於前人於
戲開國浚郊具儀文於鐵鉞承家新鄭紹世美於衣冠
錄我絲綸告爾宅窋可追封陽翟王

朕論功定賞念扞衛之多難推慶行封俾覃延於三世
懿彼靜女配予先臣具官某故曾祖母梁國夫人呼圖
克章蚤飭壺儀克承宗事不假詩書圖史之戒素閑織
紉組紃之功迪美萃於曾孫發祥殷於令族新廟奕奕
斷松栢於析津原田每每畫封圻於梁土龍章有赫象
服來歆可追封陽翟王夫人

朕獎元勛恩推舊德濟其世美詒厥孫謀屬大業之中
興賴名藩之外援追封奕業實著彝章具官某故祖父

守忠翊正效節宣力功臣太師金紫光祿大夫上柱國
梁國公諡莊順青哈質稟淳龐躬行愷悌橐鞬宿衛久
服勞於王家弓冶承傳遂開先於相閥方乾坤之清謐
俾綸綍之渙頒用禮勸忠書功旌善於戲伊洛瀝澗樂
哉魂魄之遊山川土田衍爾蒸嘗之奉昭茲來裔祐我
丕基可追封河南王

命婦朝后彤管著於女箴令妻相夫鞶絲陳於內則亶
惟淑德嬪於名門具官某故祖母梁國夫人呼喇濟毓

質柔嘉修容婉婉久襲祥於世業當擢秀於孫枝為國
懷材贊予茂烈雲翔鸞詒俾澤漏於泉臺颺轉魚軒想
神遊於梁苑尚詒多祜福爾後人可追封河南王夫人
惟王建國必崇德以報功自天降康乃生賢而靖難茲
眷元臣之懿宜推先正之褒具官某故父懷忠濟美積
德崇慶功臣太師開府儀同三司上柱國特進河南王
諡忠懿錦濟勒蘊善弗彰紹謀斯永為郎執戟風多宣
力之勤有子克家益勵敬忠之訓定中興之大策立不

世之殊勛匪行王封曷稱朕意於戲河山帶礪式藏盟
府之書乾坤珍符期篤熙朝之祐格思英爽歆此寵光
可追封鄭王

朕惟元臣克相中興之業母有令子宜膺崇秩之封稽
諸彛章廣我孝治具官某故母河南王夫人揚珠奇納
夙閑姆訓綽著婦儀薦蘋藻於蒸嘗節珩璜於夙夜內
政素勤於中饋慈訓尤切於斷機德啟閨門光資邦國
倬茲鄭圃乘翟茀以來遊嘉彼召南賦鵲巢以行化俾

頒綸誥用賁泉局可追封鄭王夫人

平章伊蘇岱爾封贈三代制

夫用之紆者積必厚行之徐者力弗殆斯道之常匪曰
責報也平章伊蘇岱爾曾祖父贈定威佐運功臣榮祿
大夫司徒柱國追封曹國公諡忠定布色出於華族夙
奮材武從我太祖皇帝親屬橐鞬崛起戎列威行方國
戰功良多及定隴陝斬將搴旗臨敵致死大節赫然傳
不云乎活千人者有後茲爾數世之遠傳家孫曾愈碩

大光顯又得議封於禮官博士非用兵有活人之德而然乎命頒異數開國曹南中土與壤襲慶濟美可示為將者之勸可贈定威佐運功臣光祿大夫司徒上柱國追封曹南王諡忠定

古禮命婦朝后是則婦官尚矣平章伊蘇岱爾曾祖母追封曹國夫人塔本劬勞慈育生子克家戰勝攻取丕佐興運議禮制度於爾有封從夫之爵曹國小君象服翟茀歆茲追寵可追封曹南王夫人

朕稽古為治立國以禮故臨御四海永慕祖宗創業之艱難美其興運佐命之臣厚厥世賞以訓臣鄰矧其胤裔又有能全其終始者乎平章伊蘇岱爾祖父贈宣忠靖遠功臣光祿大夫中書右丞相柱國追封曹國公諡桓毅額里根蚤備宿衛分從賢王前驅先登戡定河外俾金國為墟而宗社遂以屋者蓋爾戰多之力焉異姓封王於爾為寵矣英爽不亡尚保爾世哉可追贈宣忠靖遠佐運功臣金紫光祿大夫中書右丞相上柱國追

封曹南王諡桓毅

夫恩禮覃於百官則先近臣漏澤施於九原則觀來者
平章伊蘇岱爾祖母追封曹國夫人穆嚕蚤嬪高門無
違宮事克相君子為王虎臣又有聞孫贊予景運俾有
司議封乃追命爾為王夫人以曹南之田為脂澤之賦
尚歆寵渥益衍廟食可追贈曹南王夫人

先王有崇德報功之制豈曰觀美蓋以旌善而勸忠也
平章伊蘇岱爾父光祿大夫中書左丞相先贈協謀定

遠佐理功臣太師開府儀同三司上柱國曹國公諡武
宣阿勒哈生長富貴宴安而氣無紕綺子弟之習勝衣
荷戈奮身前驅維時世廟觀兵江潁貔虎百萬之衆謀
臣如雲乃能立功名於其間北征叛王轉戰千里南殄
奔君樹旗海嶼勛勞顯著寵賚便蕃我國家於君臣之
道可謂至矣朕不聞鼓鼙猶思將帥況爾有後為予蓋
臣中興之初率兩河將士勦力介冑之間大臣以聞乃
隆推恩之禮上及於爾三世馬曹南之郊桑谷沃壤開

國稱王人臣極位爾克有靈歆我綸命可贈推誠宣力
定遠佐運功臣太師開府儀同三司上柱國追贈曹南
王諡忠宣

我國家經營南國之初尚賴膂力之士材武之臣克成
大業勛勞之蹟皆以銘於太常矣又且尊顯其身以至
於室家之有慶者茲非典禮之懿乎平章伊蘇岱爾母
曹國夫人托多淑慎端惠夙配君子遵召南之化而象
服是稱施孟母之教而訓忠有言卓茲令器為朕虎臣

臨御之際褒錫宜先開國曹南以衍脂澤之賦煒其榮
哉賁爾寔窆可追封曹南王夫人

君子不昵於宴安之私以能成其功名者亦嘗資於內
助焉平章伊蘇岱爾母曹國夫人庫庫楞幽閒端懿鷄
鳴而起相其宗事婦德有稱沒從夫爵啟封曹王魚軒
象服裕爾後昆可追封曹南王夫人

太傅圖嚕封諡制

帝垣台位象已著於上玄太傅師臣官尤崇於常秩有

懷舊德追錫真王太傅圖嚕蚤陟華階懋修素履小心
翼翼文昭持橐之班終日乾乾勞著屬橐之績宗親入
覲儉相是資耐金不罰於諸侯英蕩悉同於元會樞機
宥府奠軍國於乂寧鼎鼎台司贊陰陽於化育踐駁禁
近閱歷歲年持風紀於臺端肅官箴於朝著天不憖遺
朕用盡傷思荅茂勲爰申卹典於戲昨爾茅土俾開國
於廣陽播予絲綸尚流澤於幽壤諒茲靈爽服此寵章
可贈懷忠秉義昭宣弼亮功臣太師開府儀同三司上

柱國追封廣陽王諡清獻

男位正家恒有資於內助女師結帨庸作配於上公獎
我舊勛迨於佳儷太傅圖膺妻輝和爾氏幽閒毓德婉
孌賦姿象服是宜奉蘋蘩於祭祀彤管有煒謹珎瑀於
箴規懋著婦功克相宮事痛所天之先殞誨厥嗣以益
嚴石窳啟封賜廣陽之大國容臺議禮贊召南之夫人
享爾高年欽此異數可封廣陽王太夫人

右丞阿勒坦封諡制

朕以崇德報功之制聖王建國之皇圖論名立諡之稱
昭代褒賢之鉅典用光綏寵俾洽臣鄰右丞阿勒坦少
稟粹姿蚤登膺仕周廬星列入陳扈蹕之勞專駟飈馳
來上屯田之奏恩威襲蠻夷於冠帶忠孝擴詩禮於箕
裘錫類著乎家邦浚明勤乎夙夜貂蟬七葉飾躬不瀆
於華鮮弧矢四方迪德彌彰於懿美篤生令器丕佐明
時聿殫嘉猷晉參大政橫經內殿矢茲密勿之言熙載
外朝體朕都俞之意有司考禮於汝推恩爰頒渙號之

辭式副哀榮之志於戲丞相一品英靈尚克以歆承泰
階六符善慶益延於似續錄諸告第欽我贊書可贈秉
義效忠著節佐治功臣太保開府儀同三司上柱國追
封特進趙國公中書左丞相諡貞孝

周南正始教化被於閨門趙國疏封寵榮光於泉壤爰
稽彝典用獎有官右丞阿勒坦妻唐古氏毓質柔嘉脩
儀婉婉來嬪閱閱蚤乘翟茀之車克相夫君並著鵲巢
之德篤生令器褒作名臣服慈訓之不忘迪嘉謀之入

告推恩追錫體人子報本之心考禮飾終示我朝廣孝
之治尚昭懿範歆此告詞可封趙國夫人

尚書左丞相某封諡制

朕纂承天序入正大統思予皇考繼志述事眷惟至大
之間更張庶政務適人宜褒贈以勸百官鼓鑄以利兆
姓時弗僉諧事或中輟興言追悼斯念舊臣故尚書省
丞相某早列環衛給事禁闥升諸台席浚明風夜佐予
皇考一德一心顧遇寵賚廷臣莫及予方以孝治天下

躬裸武廟如見羹牆況予先臣有子在列茲命禮官公
議於廟謂爾宜封郢城王位貴專楚都旌旗斧鉞開國
西南精忠不昧尚從先皇於遐狩哉可贈竭忠宣力守
義佐治功臣太傅開府儀同三司柱國郢城王諡榮敏
表牋

賀元旦表

皇極建中賁嘉生於世運乾元資始衍嗣歲於人時叶
氣開先純陽肇德欽惟道全居正功治體仁坐宣室以

受釐百神奉職御明堂而布政萬國咸寧勾陳環列於
端門庭實駢羅於文陛臣某等塵聯烏府迹簞鵷行進
封事於銀臺慚稽袞補紀卜年於寶曆欣對嵩呼

正旦賀興聖宮表

帝厯開天祥發貞元之會母儀法地源疏河海之涵百
物順嘉四時叶序欽惟陰功庀世懿德承乾肇聖緒於
姜原彌虔祖武嗣徽音於太姒益衍孫謀茂綏獻歲之
祥膺保履端之吉臣某等遭逢世泰綴列朝行官備中

臺王朔願敷於錫福慶隆長信民功仰荷於資成

賀正旦箋

夏正授時謹民功於肇始皇儲主器履帝武於開先慶
集三朝福覃萬姓恭惟秉文純粹叶德光華青煒一作緯

迎陽爰啟前星之重黃離繼照式昭太極之尊宅元祀
以承天布王春而獻歲臣某等叨塵官序忝列諫垣齒
曹虞庠茂對奎明於午御賡歌魯頌仰觀日麗於寅賓

賀建儲表

伏以天潢毓德聿開聖嗣之隆廟祐承祧爰啟儲闈之慶祥臻泰道福集昌朝欽惟迪德堯仁躬親舜孝日麗乎天而明兩益紹重華帝出乎震而洊雷彌嚴繼體乃眷元良之懿式膺監撫之崇臣等備位烏臺趨朝鷄曙前星奏瑞載瞻青輅之旂太極含元第衍黃圖之籍

賀春宮箋

甲觀儲祥肇泰始含章之慶春宮正位受少陽體德之尊神器有歸宗祧是賴恭惟生知忠孝夙稟溫文躬問

侍之勤德已昭於帝胄膺監撫之重道允叶於皇猷承
華克紹於丕基建本方隆於大寶臣某等忝居侍從喜
際文明鶴禁景運願早親於四學雲門樂奏期介祉於
三官

賀建儲表

聖嫡承祧大慶方延於國祚神孫主器鴻休實肇於天
源龜筮叶從臣鄰效順欽惟慈仁坤育靜德乾儀益恢
皇極之尊繩其祖武俾正少陽之位貽厥孫謀建儲允

屬於元良繼體式昭於岐嶷臣某等叨塵憲府欣遇熙
朝瞻鶴駕於春宮三靈奉翊陪鵷行於長信萬福時臻

監修國史賀正表

瑤圖撫運紹開致福之祥寶厯乘時肇序體元之始大
鈞播物淑氣迎和欽惟道洽古今性資文武潛心帝王
之學聖敬日躋合德天地之仁皇猷允塞歲事啟成於
農扈治功端本於王正臣某等辱備台司監綜史氏觴
稱萬歲樂快覩於龍光書載三墳期永垂於孤筆

監修國史賀正表

天明即命紹開帝厯之隆王朔體元序正人時之始大
鈞塊北和氣沖融欽惟叶德重華備道全美御端門而
肆赦萬寓熙春坐宣室以受釐五辰順軌方九賓之在
列萃諸福以來臻臣某忝列師垣兼塵史觀猷尊奉勸
庸申效於嵩呼鴻筆紀謨願同符於龜畫

賀建儲表

禮謹承祧首正元良之位德符主器丕昭大統之歸宗

社人安臣鄰慶抃

中賀道侔

乾始祥發震亨受命建中

邦家之基鞏固詒謀思永著龜之吉叶從重暉煥於前
星鏤冊光於上嗣監撫有托似續無疆臣等獲覩青宮
幸趨絳闕聖神永錫頒壽考之萬年忠孝彌彰衍本支
之百世

賀建儲箋

德配前星肇正青宮之位禮嚴吉日丕昭寶冊之尊任

重承祧職勤問寢

中賀

溫恭夙著英叡日新受震建中

式際上元之運明離繼照永開太平之基啟鶴禁以肅
清奉龜圖以祇敬國本斯立宗支以昌其等職厠虞庠
班聯魏闕終始於學顧廣緝熙之功追琢其章庸贊泰
和之治

賀立后建儲表

冊建中宮體黃裳之居正祧承長器仰蒼震之儲祥國
本以寧壺儀攸敘中敘聖資神武玄德欽明美教化厚
人倫允叶相成之義奉宗廟承祭祀丕昭繼照之明慶

洽三宮懽騰八表臣某職塵仙館班筵帝廷運值上元
盛典並行於吉日天開大定顯謨已著於初年

青詞祝文

壽寧宮設醮青詞

伏以道妙無言神功不宰既仰成於乾造實默相於皇
家祇即琳宮肅延羽服誦瓊文之累笈格絳景於叢霄
伏願有感必通俾昌而熾五風十雨爰祈玉燭之調億
載萬年益衍瑤圖之永

祭星祝文

太歲
迎神

白虎
送神

病符
喪門

於穆元造孕靈載物神御所棲曰歲斯福順成導祉備
我牲玉叶德坤儀受天百祿

坤一作

輿載靈司彼金方宣義揚威以戒時康后儀象

坤靜德是將以籲以祈神其降祥


運化流行元氣大和轆轤上下或爽以瘥瘥茲明誠儀
物孔多期底善寧如山如河

維靈在幽輔茲歲君或侈陰威疵癘我人啟迪佳美惠

布善人鑒茲蠲潔以求報禋

明明在上不顯亦臨牲幣孔碩聿將厥心神之格思有肅其歆

我俎既馨我祝維修辰舍順軌神旗安游相我坤寧叶于皇猷



石田文集卷六

欽定四庫全書

集部

石田文集卷八

詳校官庶吉士臣龍廷槐

侍讀臣孫球覆勘

總校官編修臣王燕緒

校對官中書臣高中

膳錄監生臣黃臣鵠

欽定四庫全書

石田文集卷七

章疏

請慎簡宮寮疏

元 馬祖常 撰

伏覩延祐三年十二月十九日皇太子正位春宮百司
上箋稱賀禮畢欽惟列聖繼統治功大洽文恬武熙百
年于茲矣聖天子高覽古今軍國之機蚤建天下之本

日月之明無以比德皇太子殿下溫文仁孝天賦美資
急宜招延天下碩德雅望文采博通之士朝夕起居以
侍左右輔養懿美薰陶沖和三代紹述厥要惟茲傳云
成王始為太子也太公為師周公為傅召公為保伯禽
唐叔與遊目不閱淫艷耳不聞優笑居不近庸邪及為
君也血氣既定游習已成雖有放心不能奪已成之性
今皇太子殿下春秋鼎盛神明日彊道德之言禮樂之
事當豫講而速親其方不過求賢而已伏乞今後議行

建立宮寮之時公集大臣覈求名實相副端能調護羽翼儲闡之才以係四海之望所謂下官臣僕亦宜精擇而不可雜以商賈冗瑣之流天下休戚之源實在於此卑職草萊賤士誤被拔擢敢不盡言少紓重責

建白一十五事

竊惟古者建立言事之官非徒撻拾百官短長照刷諸司文案蓋亦拾遺補闕振舉綱維上有關於社稷下有係乎民人禮文風俗治體所存名爵謚贈政理斯在教

化有方則善惡自別設施有法則緩急自明重穀則農
自勤定制則官自守修武則先恤兵嚴事則可勸吏事
欲究其本末言似涉於繁蕪統論難悉條析易陳所有
建白事一十五件逐一開具如左合行具呈憲臺照詳
伏請聞奏施行

一夫惟天子者上承天下紹祖宗社稷是寄黎庶是
戴嵩高尊大無與比隆奉養當極其精美保愛當極其
嚴密大而一飲一食小而一嘖一笑若調攝聖體凝順

中和則清明在躬淑善咸應欽覩皇上仁心如堯儉德如禹伏願重以承天地祖宗之鴻業於進御之間當以玉食宜乎榮衛者為先至於酒醴固是穀麥所釀然更乞於進御之際命近侍臣鄰思一獻百拜之義則天下生靈不勝幸甚

一郊祀者國之大禮在古所隆欽惟聖上仁慈孝敬度越百王伏願今後郊祀之日大駕親有事於南郊親裸於太室則天地答貺神明降禧薄海内外咸仰聖德太

平之福羣生幸甚

一大內正衙古之帝王朝百官之地今大明殿是也觀闕盤鬱城雉繚環祖宗之所御黎庶之所瞻今聖上謙德彌恭尚居東宮之舊竊慮民物觀聽有所未喻伏願賜御大明正衙鎮服華夏統體天地何以言之譬日月星辰順居次舍則萬物被光羣生仰明也

一百官朝見奏事古有朝儀今國家有天下百年典章文物悉宜粲然光於前代況欽遇聖上文明之主如科

舉取士吏員降等之類屢復古制惟朝儀之典不講而行使後世無所監觀則於國家太平禮樂之盛實為闕遺且夫羣臣奏對之際御史執簡史官執筆縉紳珮玉儼然左右則雖有懷姦利乞官賞者亦不敢公出諸口如蒙聞奏命中書省會集文翰衙門官員究講參酌古今之宜或三日二日一常朝則治道昭明生民之福也一古之為治盖有禮樂非徒事刑法之末也夫有道之世措置施設悉存禮樂之義欽惟聖上君德昭然孝慈

純備嚮居潛邸招致天下儒學之臣延納海內知名之士禮樂文物洽乎聖性一作情故踐位以來進儒術而抑

吏道却珍禽而絕遊畋清心寡欲民物豐阜其用儒之效固已驗矣獨未聞今皇圖左右天下儒學之臣有幾海內知名之士有幾伏願憲臺聞奏乞賜依准治古之法命朝臣集議典制請行皇太子視學齒胄之禮明示天下教化之本雖道德之躬仁孝溫文固已篤至然聞見習熟又在薰陶此實係國家萬世之福卑職先上章

疏特請選擇師傅左右之人至今未蒙施行然區區之情實念及此不勝切至之甚

一中書省樞密院御史臺三府掾史雖職掌文書亦日佐大臣決理政務伏請聞奏設立律學算學博士命隨朝二品三品正流衙門吏人欲求轉補三府掾史者就其所業於律學算學博士之前應試依科舉差監察御史監試吏禮部官知舉每一周歲試舉一次則三府有得人之實下無躁進營求之私試中之人不必限以出

身之高下不中者發下本役考滿不得過從七品仍預照會施行則立賢無方公道不偏

一諸道宣慰司除吐蕃南詔兩廣福建外如淮東浙東荆南山東四道並為無用徒月費俸廩坐養官吏而已如依准前代之制就令一道重鎮路分總管達嚕噶齊帶受本道宣慰使等職名鈐轄數路上不煩朝廷虛設職官人吏下不使數路官府牽制煩複無益於事

一諸翼軍官自萬戶下至百戶子弟承襲父兄之職者

合參酌古今之宜設立武舉並須習學兵法武藝如蒙
古色目人只試以武藝如願試兵法中者陞階漢人兼
試兵法武藝中式者方許承襲如布衣之士願試及中
者於各翼或不敘或戶絕等歇空相因名闕內擢用如
此庶使武備不弛軍政稍嚴保大定功之事為體不輕
必若今日難於更張則四方宣力老將既已病死承襲
驕脆子弟但知酒色裘馬為華好一旦真欲冒矢石執
干戈以犯勍敵不惟本人自取肝腦塗地從軍將吏死

復何辜卑職歷觀前古之迹其禍患弊病未有不生於
太平之世竊慮及此伏乞施行

一司徒司空皆古三公之流人臣名爵無與此位比者
聖上踐祚之初沙汰冗濫尤慎此官近歲屢有雜人等
如沈宗攝汪元昌輩亦受司空司徒竊慮天下後世傳
為口實非便

一親民之官守令為急然守令者緣係朝廷遷除之人
才或不良心亦知懼而行省所差府州司縣提控案牘

都吏吏目典史之徒往往恃其名役之細微縱其姦猾舞文弄法操制官長傾詐庶民蓋此徒出自貼書小吏數十年間轉充是役卑職頃居田畝嘗聞此等言曰我等身無品級子無蔭敘原此初心謂之無賴而令竊弄府州司縣之權剝刻單弱以肥其妻孥良可憫歎如蒙聞奏命中書省除各路存留流官經歷知事照磨外其餘革去請參酌古制令各州判官僉書州事各縣主簿勾稽本縣文簿實為官制不紊體統稍均人既有名事自

不苟為係於民不細伏乞施行

一命將守邊國之司命然御將之方當盡其道毫銖一
失利害懸絕要先知其艱難勞苦之情平居使之順其
逸樂畧其深文密法而不責其小廉曲謹然後效死也
易是為御將之道夫將不可不擇也擇而用之勿疑不
疑則專專則重重則可倚倚之而不效則召而殺之無
輕召之理今近歲連召北邊大將似涉輕易古語云臨
敵易將非策也竊慮及此伏乞聞奏施行

一漢軍征戍嶺海之南歲病而死者十率七八其所屬軍官利在危殆之際必用資財擬指軍人北方本家所有孳畜田產厚息借貸准折還納終致破產不敢有詞夫以世襲軍官蠶食部下行伍深可哀痛今後如蒙將在嶺海及漳汀等數處征戍軍人果有病患除官為看醫外其貧苦闕用之人比及取發封裝以來宜令本處有司約量借放封裝到日撥除還官並不收息或應借貸而不借貸不應借貸而借貸者從本道廉訪司體察

究治如此庶不致中原軍戶日蹙軍官日富

一侍衛親軍根本所係宜令各衛指揮使立時教閱練習武藝膂力訓練精銳則萬一倉卒得用仍除鎮衛守把外一令與官員作工蓋造役使勞苦幸甚

一太常定謚古今美制欲使姦人知懼於死後善人有勸於生前近歲謚號之稱不公殊甚如今後太常定謚不公宜令監察御史糾彈庶使輿情稍伸國典不曠一農穀天下之本也四民則以農為次百貨則以穀為

首操帛布之重輕闕生民之休戚者穀為急焉而近年
工商淫侈游手衆多驅墾畝之業就市井之末蓋為政
者失勸農之道焉今後乞將各路府州縣達嚕噶齊專
管諸軍鄂勒總管知府知州縣尹專勸農事事既歸一
功仍可就更講究重穀勸農之方畫一開出行下有司
遵守如民有馬牛騾畜遞相食踐田苗并此彼爭告田
土疆界不實等罪名及民間婚姻債負拖欠金銀資財
許得以穀贖罪准折輕齎之類果有力田之人縣州勸

農官等就於見在錢糧內撥賞束帛豚酒然後開申不實者許廉訪司體察如此旌異慰勞行之數年必有成效

請量移流罪

禮樂刑政治國之具有一不修則弛法度欽惟國朝有天下以來不嗜殺人仁覆生齒涵濡煦育洽然太和而於用刑尤切慎重然伏見近年頒降德音中間屢無量移流徙之文竊慮聖人愛物之仁推恩未悉有傷至化

夫大辟死罪或被赦原釋然歸保妻子而減死流罪竟無寬宥不得生還里閭此豈法之平允哉今後如有例合長流罪惡別請定擬長流條例其不應長流者亦請驗情輕重度地善惡每遇恩澤輒行量移如蒙檢舉典故施行則天下生靈幸甚

辨王左丞等

竊聞傳云王臣蹇蹇匪躬之故國家實賴焉夫便佞辨給徒利一已視國與民漠然如無情者國家何補哉伏

見中書左丞王伯弘前中書平章政事拜珠曩在政府
常以直言正色力持公平與權臣特們德爾抗論可否
若此二人其於國家緩急之際剛毅不屈信可倚仗宜
從憲臺聞奏將二人擢實機要不令外補實社稷之計

彈大都路總管范完澤

伏惟京尹之職民實具瞻漢唐以來尤慎茲選至如我
朝掄才審官嘗難其人不以輕授初如嚴游張郭近如
姚冀二王等俱負才幹悉有名稱綠飾文雅練達事務

中外厭服士論美之苟非其人曷以尸職今某非儒非吏素無寸長才名不著於當時祿位苟同於先輩復若近日私家被盜一事自至所屬兵馬司公廨迫勒訊問賊徒侵官失體廢法任情即此而觀他可槩見理宜奏代別選才能相應

彈中書叅議博囉等官

近為太師右丞相特們德爾濫用人員窒塞常選已嘗論列今察知中書叅議博囉劉吉等四人俱係特們德

爾腹心之人依憑請託假借權勢博囉乃前尚書省得罪之人劉吉乃宣政院起身之冗吏左司都事馮翼霄在宣政院僥倖驟進右司都事劉允忠乃胥吏微品朦朧奏准起復喪次以圖躁進如此四人列居顯要贊畫政事豈惟玷辱名爵實廢清議宜從憲臺奏罷

論執弓矢禁例

近承奉照會該欽奉奏准禁約漢人百人以上執弓箭打圍處重刑百人以下流遠方微及一兔之獲罪各有

差竊謂作法有名垂訓無弊且今日見行條例已有禁漢人弓矢之科又有禁諸人聚衆之制若復以上項打圍處重刑等例錯綜而網羅之誠恐愚氓舉足陷罪難避易犯實為可憐而朝廷受禁人捕獸兔之名尤為非美宜從合干部分檢舉禁籞園地舊規遵守施行不勝幸甚

論秦州成紀縣等處山移事

伏見議遣大臣馳駟陝西賑恤災異祈謝岳鎮卑職叨

冒言路敢有愚昧謹用敷請夫山移大變實維天譴是為不動之物而動大臣以下各宜辭避官位推讓賢能畏懼修省表奏待罪庶乎對越上帝而為國綿延丕基非但遣使祈謝賑恤一方一隅而可彌災也竊又聞之應天以實不以文昔師曠對晉平公石言之語載在方冊世世為監今山移之譴理無虛示豈非在野有當用不用之賢在官有當言不言之佞所以感召不動之物而動毒延庶民甚可哀痛且端本首善在乎幾微萬物

咸遂百職共宜然後高下奠位山川宅寧伏乞憲臺早
為敷奏任用賢才相應

論百官請賞

比見隨朝見任請奉官員不思廉慎奉揚迺職或求婦
嫁女或市宅營私往往交為懇奏財物私相賣恩實蠹
公帑夫寵賞賜賚下及臣庶國之所以鼓舞激厲天下
之具而為人臣者蒙受恩澤之時又當戒盈畏溢固讓
力辭必不允請然後敢受豈容敢瀆褻天聽乞請財物

者哉況見任官員自有俸給祿廩之厚品職封蔭之榮至如一錢一米擬合為官惜費而乃上虛府庫自肥其家其於忠孝廉恥胥失之矣今後如蒙憲臺明白聞奏禁約見任請俸官員不得交相懇奏財物仍令監察御史糾彈庶幾賞及有功貪人知懼卑職愚誠不避謗怨惟圖報稱少裨治明

論加恩典

故大中大夫浙東宣慰使陳祐執德不回夷險一致始

由才選擢任專城傲歷清資榮居方面當其蹈節而遇
害豈知徇祿以偷生况忠讜之言素著於時而患難之
際益明其志可謂不辱其身者矣稽諸卹典爰有加封
施及舊臣庶乎無媿竊聞禮及賢臣國無不治之政思
推耆舊士有先死之心故蔡國公張柔拔起編伍歸身
我朝擢甲荷戈開拓土宇卒為名將有稱於時偉績碩
功載在史冊如比史忠武公例進封為王可為無慊前
翰林學士承旨劉敏中文采振發學淳行美精力未衰

斂身求退高蹈之節近世所無理宜半俸養老於家激厲廉恥有關治化

舉翰林侍制袁楠等

上件官學問究極乎羣經文章粲著乎當世修國史則足以宣揚聖業代王言則足以潤色皇猷久次翰林屬官誠為淹抑翰林修撰陳觀性稟端方操履嚴慎使之居糾察之地必能振舉職業不苟於事前國子司業吳澄知經一作今博古學術淳深求之海內可謂名儒如蒙

擢置兩院以備訪問相應

彈右丞相特們德爾

伏見中書右丞相特們德爾貪縱不正擅弄威福國之
姦邪民之蠹蠹已嘗上章論列今復體察到不公不法
等事一十一件

云云當時
不曾存稿

如蒙憲臺早為聞奏追問則

天下生靈不勝幸甚

進千秋記略劄子二

伏以賓贊之官專以輔導為職輔導之方又以毓德為

急古先聖王嘉言善行日陳於前所以薰陶漸染養成
至性者實在乎此卑職忝居是任惟懼弗稱今纂集先
代儲貳故實及為臣子之道逐一繕寫成書名曰千秋
記略謹用黃綾裝背隨咨前去早為擇日一同進呈乞
依准經筵例進講施行

當職近纂集到千秋記略一書用黃綾裝背已嘗隨咨
發去貴院乞擇日進講去訖至今四月未蒙施行又照
得詹事賓贊等官俱以輔道為職理宜協恭調護事大

體重責望非輕除外更乞早為擇日進講施行須至咨
呈者

石田文集卷七